



IN MEMORIAM

Dr Davor Baković, redovni profesor Tehnološkog fakulteta u Zagrebu, dugogodišnji nastavnik predmeta »Tehnologija mlijeka i mlječnih proizvoda« i istaknuti pedagog, naučnik, stručni i društveni radnik, zauvijek je napustio našu sredinu tragičnom smrću

Prof. dr Davor Baković rođen je 17. 1. 1922. u Nerežišću na otoku Braču. Školovao se u Zagrebu — diplomirao je na Poljoprivrednom fakultetu u Zagrebu 1948., a na Tehnološkom fakultetu u Zagrebu 1965. godine. U toku rata prekinuo je studije i boravio je u logoru u El Šatu. Nakon završenog studija radio je u Ministarstvu poljoprivrede u Zagrebu, Direkciji planinskih dobara u Gospiću i u Institutu za jadranske kulture u Splitu.

Opredijelivši se u svojoj stručnoj i naučnoj orijentaciji za oblast mljekarstva, specijalizirao se u zemlji i inostranstvu. Doktorsku disertaciju pod naslovom »Prilog poznavanju osobina i proizvodnje ovčjih sireva Dalmacije« branio je 1957. godine na Poljoprivrednom fakultetu u Zagrebu.

Od 1958. radi a Tehnološkom fakultetu u Zagrebu, gdje je napredovao od asistenta do redovnog profesora. Za docenta je izabran 1965., za izvanrednog profesora 1972., a za redovnog profesora predmeta »Tehnologija mlijeka i mlječnih proizvoda« 1977. godine. Bio j predstojnik Laboratorija za tehnologiju mlijeka.

Nastavno-naučna i stručna djelatnost prof. Bakovića je opširna: 29 naučnih radova, 22 stručna rada i niz drugih stručnih aktivnosti: investicioni programi, studije i javna predavanja. Kao nastavnik razvijao je nastavni proces i eksperimentalni rad studenata te uspješno vodio izradu studentskih diplomskih radova, učestvovao u postdiplomskoj nastavi i vodio doktorate nauka.

Prof. Baković je uložio mnogo snage i aktivnosti u organizaciju seminara za mljekarsku industriju na kojima su učestvovali stručnjaci i naučni radnici iz cijele zemlje. Materijali seminara su vrijedan stručni doprinos mljekarskoj nauci i praksi.

Niz godina prof. Baković je bio glavni i odgovorni urednik časopisa »Mljekarstvo«. Svojim samoprijegornim radom i visokim stručnim znanjem mnogo je doprinio kvalitetu i nivou časopisa. Aktivno je učestvovao u radu Udruženja mljekarskih radnika Hrvatske, Društva nastavnika Sveučilišta u Zagrebu, Društva za unapređenje ishrane naroda Hrvatske i u nizu drugih organizacija i samoupravnih organa.

Prof. Baković je kao čovjek, nastavnik, naučni radnik i stručnjak bio omiljena ličnost, pun razumijevanja za studenta, radnika, suradnika i kolege. Skroman i pun mnogih kvaliteta otišao je nenadano 31. I 1983., ostavivši iza sebe prazninu koja će se teško ispuniti u cijelom jugoslovenskom mljekarstvu. Svi njegovi suradnici, prijatelji i kolege zadržaće ga u trajnoj uspomeni kao cjelovitu ličnost.

Neka je vječna slava i hvala prof. dr Davoru Bakoviću!

Prof. dr Natalija Dozet
Poljoprivredni fakultet
Univerziteta u Sarajevu
III 1986.